



PROMOZIUN DA L'INTEGRAZIUN CHANTUN GRISCHUN

Dumondas da finanziaziun per projects d'integraziun 2023 en il chantun Grischun

L'integraziun da las personas estras che vivan en Svizra è ina da las sfidas las pli impurtantas dal futur. Quai vala er per il chantun Grischun, nua che var 36'000 personas da circa 130 pajais vivan, lavuran ed han il center da lur vita.

Tras la lescha introductiva tar la legislaziun federala davart las personas estras e davart ils fatgs d'asil è vegnida creada la basa legala necessaria per l'integraziun da personas estras en il chantun Grischun e fixada la basa per l'orientaziun futura da l'integraziun.

Il post specialisà per l'integraziun dal chantun Grischun sustegna projects d'integraziun che cumpletteschan las purschidas da las structuradas regularas sco scolina, scola, furmaziun professiunala, martgà da lavur u fatgs da sanadad. La finamira è la promoziun da l'integraziun linguistica, professiunala e sociala da personas estras che han prendi ina dimora legala e durabla en il Grischun per las dar las medemas schanzas che las personas indigenas han per l'access a resursas socialas ed economicas da noss chantun. Per quest intent pajan la confederaziun, il chantun e las vischnancas – en il rom da la realisaziun dal program chantunal d'integraziun (PCI) dal Grischun – contribuziuns finanzialas a favur da projects d'integraziun en ils secturs lingua, promoziun tempriva e furmaziun da geniturs, infurmaziun ed orientaziun en il mintgadi, furmaziun facila ed integraziun sociala.

Curs da lingua:

La cumpetenzza linguistica è ina premissa decisiva per l'integraziun sociala e professiunala sco er per l'access a tut las instituziuns publicas. En quest senn sustegna il chantun curs per emprender la lingua locala. Uschia duai vegnir promovida la comunicaziun e la chapientscha cun la populaziun indigena e mess il fundament per dumagnar il mintgadi en Svizra. La purschida da curs sto tegnair quint dals basegns specificis da las personas, per las qualas ils curs èn concepids, e sto vegnir realisada da specialistas e specialistas qualifitgads.

Promoziun tempriva d'uffants en la vegliadetgna prescolara e furmaziun da geniturs:

Per dar ad uffants da lingua estra uschè bunas schanzas da partenza sco pussaivel per la carriera da scola, sustegna il chantun projects che promovon sistematicain las cumpetenzas linguisticas d'uffants en la vegliadetgna prescolara e/u rinforzan e sustegnan ils geniturs en lur incumbensa educativa. En quest connex duain vegnir promovids en spezial projects d'integraziun linguistics che pussabiliteschan d'emprender la lingua locala tras il giu ed en il contact cun uffants indigens e che integreschan ils geniturs da lingua estra en moda e maniera adequata.

Purschidas per promover l'infurmaziun, la furmaziun facila e l'integraziun sociala:

L'infurmaziun è in factur-clav per l'integraziun. Per dumagnar en moda autonoma il mintgadi e per promover la participaziun da las personas estras en tut ils secturs da la vita, vegnan sustegnidas purschidas relevantas per l'integraziun che intermediesschan infurmaziuns davart il viver ed il lavurar en il Grischun, davart las structurass regularas sco ils fatgs da sanadad u il sistem da scola e da furmaziun sco er davart las normas e las isanzas localas. En il rom da l'integraziun sociala pon vegnir garantidas contribuziuns finanzialas a favur da projects che han l'intent da promover il barat e la chapientscha tranter personas immigradas e la populaziun locala, er projects che sa basan sin l'engaschament social e civil en il sector da la convivenza (p.ex. mentoring u tandem).

Uniuns e lur engaschament per l'integraziun:

La participaziun sociala – ina da las premissas per che l'integraziun haja success – ha lieu là, nua che umans sa scuntran. Il post spezialisà per l'integraziun sustegna uniuns ed organisaziuns che s'engaschan explicitamain per l'integraziun, che emprovan activamain da gudagnar personas estras sco commembras e che promovon il barat social tranter personas indigenas e personas immigradas. Sut quest aspect vegnan er sustegnidas uniuns estras che tschertgan la collavuraziun a lunga vista cun uniuns indigenas per realisar projects duraivels.

Inoltraziun, contact e cussegliaziun

Organisaziuns ed uniuns interessadas sco er purtaders interessads che vuessan realisar in project d'integraziun l'onn 2023 e che vuessan dumandar in sustegn finanziel per quest intent, pon inoltrar a partir d'immediat lur dumondas en scrit a l'uffizi da migraziun e da dretg civil, Post spezialisà per l'integraziun.

Las directivas correspondentas ed ils formulars d'endataziun sa chattan sin www.integration.gr.ch.

Las dumondas ston vegnir drizzadas via e-mail:

Curs da lingua

- marzena.giems@afm.gr.ch

Promoziun tempriva e furmaziun da geniturs

- martina.hedinger@afm.gr.ch

Promoziun da l'infurmaziun, da la furmaziun facila e da l'integraziun sociala

- tamara.gianera@afm.gr.ch

U a la suandanta adressa:

Uffizi da migraziun e da dretg civil dal Grischun

Post spezialisà per l'integraziun

“Projects d'integraziun”

Grabenstrasse 1

7001 Cuira